

四庫全書

史部

欽定四庫全書

史部

水經注集釋訂訛卷二十五

六

詳校官監察御史<sub>臣</sub>周元良

刑部郎中<sub>臣</sub>許兆椿覆勘

總校官原任中允<sub>臣</sub>王燕緒

校對官中書<sub>臣</sub>吳裕德

謄錄舉人<sub>臣</sub>龔秉震

欽定四庫全書

水經注集釋訂訛卷二十五

歸安沈炳巽撰

泗水 沂水 洙水

泗水出魯卞縣

今為兗州北山府泗水縣

地理志曰出濟陰乘氏縣又云出卞縣北經言北山

皆為非矣山海經曰泗水出魯東北余昔因公事沿歷徐沭路逕洙泗因令尋其源流水出卞縣故城東

南桃墟西北春秋昭公七年謝息納季孫之言以孟氏成邑與晉而遷于桃杜預曰魯國卞縣東南有桃虛世謂之曰陶墟舜所陶處也井曰舜井皆為非也

御覽引此作皆為此也

虛有澤澤方一十五里淶水澄渟三丈

上下疑有訛字

如減澤西際阜俗謂之媯亭山盖有陶墟舜

井之言因復有媯亭之名矣阜側有三石穴廣圓三四尺穴有通否水有盈漏漏則數夕之中傾陂竭澤矣

御覽引此作阜側有三石穴廣圓三四尺穴有通否水有盈漏漏則數夕之中傾陂竭澤矣左右

民居識其將漏預以木為曲狀約鄣穴口魚鱉暴鱗不可勝載矣自此連岡通阜西北四十許里岡之西

際便得泗水之源也博物志曰四出陪尾盖斯阜者

矣

元和志泗水出泗水縣東陪尾山其源有四四泉俱導因為名今縣東五十里有陪尾山縣志云

陪尾山下有泗水神祠祠前有泉林寺寺之左右皆深林茂樹有大泉十數澍泓激澈互相灌輸會而成溪是為泗水南運卞城東有橋曰卞橋自卞橋西至縣城復有大泉數十南北交會入于泗水以達曲阜大抵縣境數十里內泉如星列皆泗水也

石穴吐水五泉俱導泉穴各徑

尺餘水源南側有一廟栝柏成林時人謂之原泉祠

何氏云今十附會子在川上非所究也泗水西逕其

即是此地蓋因源泉之額故也

縣故城南

在今泗水縣

春秋襄公二十九年季武子

取卞曰聞守卞者將叛臣率徒以討之是也南有姑

蔑城春秋隱公元年公及邾儀父盟于蔑者也水出

二邑之間西逕郟城北春秋文公七年經書公伐邾

三月甲戌取須句遂城郟杜預曰魯邑也卞縣南有

郟城備邾難也泗水自汴而會于洙水也

西南逕魯縣北

今曲阜縣治即魯縣故城

泗水又西南流逕魯縣分為二流水側為一城為二水  
之分會也北為洙瀆春秋莊公九年經書冬浚洙京  
相璠曰杜預並言洙水在魯城北浚深之為齊備也  
南則泗水夫子教於洙泗之間今於城北二水之中  
即夫子領徒之所也從征記曰洙泗二水交於魯城  
東北十七里闕里背洙泗牆南北一百二十步東西  
六十步四門各有石閘北門取洙水百步餘後漢初  
闕里荆棘自闕從講堂至九里鮑永為相因修饗祠

以誅魯賊彭豐等郭緣生言泗水在城南非也余按國語宣公夏濫於泗淵里克斷罟棄之韋昭云泗在魯城北史記冢記王隱地道記咸言葬孔子於魯城北泗水上今泗水南有夫子冢春秋孔演圖曰鳥化為書孔子奉以告天赤爵銜書上化為黃玉刻曰孔提命化應法為赤制說題辭曰孔子卒以所受黃玉葬魯城北即子貢廬墓處也譙周云孔子死後魯人就冢次而居者百有餘家命曰孔里

孔子墓在曲阜縣西北八里史



記孔子世家孔子葬魯城西北泗上弟子皆服三年  
三年心喪畢相訣而去子貢廬於冢上凡六年然後  
去弟子及魯人往從冢而家  
者百有餘室因命曰孔里  
孔鮒曰夫子墓塋方一

里在魯城北六里泗水上諸孔氏封五十餘所人名

昭穆不可復識有銘碑三所獸碣具存皇覽曰弟子  
各以四方奇木來植故多諸異樹不生棘木刺草今

則無復遺條矣

皇覽原文較此稍詳附錄于後孔子冢去城一里冢塋百畝冢南北廣十

步東西十三步高一丈二尺冢前以甃甃為祠壇方  
六尺與地平冢塋中樹以百數皆異種魯人世世無  
能名其樹者民傳言孔子弟子異國人各持其方樹  
來種之其樹柞枌維離女貞五味鬯檀之樹孔子塋

中不生荆棘  
及刺人草

泗水自城北南逕魯城西南合沂水沂  
水出魯城東南尼丘山西北山即顏母所祈而生孔  
子也山東一十里有顏母廟山南數里孔子父葬處  
禮所謂防墓崩者也平地發泉流逕魯縣故城南水  
北東門外即爰居所止處也國語曰海鳥曰爰居止  
於魯城東門之外三日臧文仲祭之展禽譏焉故莊  
子曰海鳥止郊魯侯觴之奏以廣樂具以太牢三日  
而死此養非所養矣門郭之外亦戎夷死處呂氏春

秋曰昔戎夷違齊如魯天大寒而後門與弟子宿於  
郭門外寒愈甚謂弟子曰子與我衣我活我與子衣  
子活我國士也為天下惜子不肖人不足愛弟子曰  
不肖人惡能與國士并衣哉戎歎曰不濟夫解衣與  
弟子半夜而死沂水北對稷門昔園人犖有力能投  
盖于此門服虔曰能投千鈞之重過門之上也杜預  
謂走接屋之桷反覆門上也春秋僖公二十年經書  
春新作南門左傳曰書不時也杜預曰本名稷門僖

公更高大之今猶不與諸門同故

左傳注  
作改

名高門也

其遺基猶在地八丈餘矣亦曰雩門春秋左傳莊公

十年公子偃請擊宋師竊從雩門蒙皐比而出者也

門南隅水有雩壇壇高三丈曾點所欲風舞處也高

門一里餘道西有道兒君碑是魯相陳君立昔曾參

居此集不入郭縣即曲阜之地少昊之墟有大庭氏

之庫

在今曲阜  
縣治東

春秋豎牛之所攻也故劉公幹魯都

賦曰戢武器於有災之庫

朱云有災字誤玉海引此  
注作有災是也古史考云

大庭氏姜姓以火  
德王號曰炎氏  
放戎馬於巨野之垆周成王封姬

旦於曲阜曰魯秦始皇二十三年以為薛郡漢高后  
元年為魯國阜上有季氏宅宅有武子臺今雖崩夷  
猶高數丈臺西百步有大井廣三丈深十餘丈以石  
壘之石似磬制春秋宣  
按左傳當是定公公十二年公山不  
狃帥費人攻魯公入季氏之宮登武子之臺也臺之  
西北二里有周公臺高五丈周五十步臺南四里許  
則孔廟即夫子之故宅也宅大一頃所居之堂後世

以為廟漢高祖十三年過魯以太牢祀孔子自秦燒詩書經典淪缺漢武帝時魯恭王壞孔子舊宅得尚書春秋論語孝經時人已不復知有古文謂之科斗

書漢書

疑作世或作時

秘之希有見者于時聞堂上有金石

絲竹之音乃不壞矣廟屋三間夫子在西門東向徵

母

朱本作顏母

在中間南面夫人隔東一間東向夫子牀

前有石硯一枚作甚朴云平生時物也魯人藏孔子所乘車於廟中是顏路所請者也獻帝時廟遇火燒

之永平中鍾離意為魯相到官出私錢萬三千文付  
戶曹孔訢治夫子車身入廟拭几席劍履男子張伯  
除堂下草土中得玉璧七枚伯懷其一以六枚白意  
意令主簿安置几前孔子寢堂牀首有懸甕意召孔  
訢問何等甕也對曰夫子甕也背有丹書人勿敢發  
也意曰夫子聖人所以遺甕欲以懸示後賢耳發之  
中得素書文曰後世修吾書董仲舒護吾車拭吾履  
發吾笥會稽鍾離意璧有七張伯藏其一意即名問

伯果服馬魏黃初二年文帝令郡國修起孔子舊廟  
置百夫吏卒廟有夫子像列二弟子執卷立侍穆穆  
有詢仰之容漢魏以來廟列七碑二碑無字栝柏猶  
茂廟之西北二里有顏母廟廟像猶嚴有修栝五株

孔廟東南五百步有雙石闕

日知錄云水經注孔廟  
東南有雙石闕故名闕

里按春秋定公二年夏五月壬辰雉門及兩觀災冬  
十月新作雉門及兩觀注雉門公宮之南門兩觀闕  
也禮記昔者仲尼與于蜡賓事畢出游于觀之上史  
記魯世家煬公築茅闕門蓋闕門之下其里即名闕  
里而夫子之宅在焉亦謂之闕黨魯論有闕黨童子  
荀子仲尼居於闕黨是也後人有以居為氏者漢書



儒林傳有鄒人闕門慶即靈光之南闕北百餘步即  
忌注云姓闕門名慶忌

靈光殿基東西二十四丈南北十二丈高丈餘東西  
廊廡別舍中門方七百餘步闕之東北有浴池方四  
十許步池中有釣臺方十步池臺悉石也遺基尚整  
故王延壽賦曰周行數里仰不見日者也是漢景帝  
程姬子魯恭王之所造也殿之東南即泮宮也在高  
門直北道西宮中有臺高八十尺臺南水東西一百  
步南北六十步臺西水南北四百步東西六十步臺

池咸結石為之詩所謂思樂泮水也沂水又西逕圓丘北丘高四丈餘沂水又西流昔韓雉射龍於斯水之上尸子曰韓雉見申羊於魯有龍飲於沂韓雉曰吾聞也出見虎搏之見龍射之今弗射是不得行吾聞也遂射之沂水又西右注泗水者也

又西過瑕丘縣東

今滋陽縣西有瑕丘故城元和志瑕丘縣泗水東自曲阜縣界流入與洙

合水屈從縣東南流漸水從東來注之

瑕丘魯邑春秋之負瑕矣襄公七年

按傳當是哀公七年季康

子伐邾囚諸負瑕是也應劭曰瑕丘在縣西南昔衛大夫公叔文子升於瑕丘蘧伯玉從文子曰樂哉斯丘死則我欲葬焉伯玉曰吾子樂之則瑗請前刺其欲害民良田也瑕丘之名蓋因斯以表稱矣曾子弔諸負夏鄭元皇甫謐並言衛地魯衛雖殊土則一也  
灑水出東海合鄉縣漢和帝永寧九年封馬光子復為侯國其水西南流入邾春秋襄公二年  
按傳當是哀公二年  
季孫斯伐邾取灑東田及沂西田是也灑水又逕魯

國鄒山東南而西南流春秋左傳所謂嶧山也邾文公之所遷今城鄒山之陽依巖岨以墉固故邾婁之國曹姓也叔梁紇之邑也孔子生於此後乃縣之因鄒山之名以氏縣也王莽之鄒亭矣京相璠曰地理志嶧山在鄒縣北繹邑之所依以為名也山東西二十里高秀獨出積石相臨殆無土壤石間多孔穴洞達相通往往有如數間屋處其俗謂之嶧孔遭亂輒將居人入嶧外寇雖衆無所施害永嘉中太尉郗鑑將

鄉曲逃此山胡賊攻守不能得今山南有大嶧名曰  
郝公嶧山北有絕巖秦始皇觀禮於魯登於嶧山之

上命丞相李斯以大篆勒銘山嶺名曰畫門

朱曰山東通志

作書門

詩所謂保有鳧繹者也濟水又西南逕蕃縣故

城南

今為兗州府滕縣

又西逕薛縣故城北

在今滕縣四十里

地理

志曰夏車正奚仲之國也竹書紀年梁惠成王三十  
一年邳遷于薛改名徐州城南山上有奚仲冢晉太  
康地記曰奚仲冢在城南二十五里山上百姓謂之

神靈也齊封田文於此號孟嘗君有惠喻

當作譽即馮煖焚券

事也今郭側猶有文冢

在今滕縣南五十里

結石為郭作制嚴固

瑩麗可尋行人往還莫不逕觀以為異見矣澌水又

西逕仲虺城北晉太康地記曰奚仲遷於邳仲虺居

之以為湯左相其侯當周爵稱侯後見侵削霸者所

絀為伯任姓也應劭曰邳存薛

宋本作邳在薛

徐廣史記音

義曰楚元王子邳以呂后三年封上邳侯也

按史表楚元王

子邳客于呂后二年封上邳侯今漏客字二年訛作三年

有下故此為上矣晉書

地道記曰仲虺城在薛城西三十里漸水又西逕至湖陸縣入于泗故京相璠曰薛縣漸水首受蕃縣西注山陽湖陸是也經言瑕丘東誤耳

又南過平陽縣西

縣即山陽郡之南平陽縣也竹書紀年曰梁惠成王二十九年齊田盼及宋人伐我東鄙圍平陽者也王

莽改之曰黽平矣泗水又南逕故城西

平陽故城在今郟縣西

世謂之漆鄉應劭

十三州記乃王義仲所著注中屢見此云應劭誤

十三州

記曰漆鄉邾邑也杜預曰平陽東北有漆鄉邾今見有故城西南方二里所未詳也

又南過高平縣西洸水從北西來流注之

泗水南逕高平山山東西十里南北五里高四里與衆山相連其山最高頂上方平故謂之高平山縣亦取名焉泗水又南逕高平縣故城西

高平故城在今鄒縣南漢

宣帝地節三年封丞相魏相為侯國高帝七年封將軍陳錯為橐侯地理志曰縣故山陽之橐也

史漢表俱作橐



侯史表索隱曰漢志屬山陽漢表師古曰索音公老反但漢志山陽郡有橐縣而無橐縣橐縣下臣瓚曰音拓彼此互異可見傳寫之誤自古而然雖以顏師古尚不及檢地志臣瓚之音漫承二表傳寫之訛而音之曰公老反則讀王莽改曰高平應劭曰章帝改書者其可不細乎

按本志曰王莽更名章帝因之矣所謂泚水者洙水也蓋泚洙相入受通稱也

又南過方輿縣東

漢書晉灼曰音房豫

漢哀帝建平四年縣女子田無嗇生子先未生二月兒啼腹中及生不舉葬之陌上三日人過聞啼聲母

掘養之

荷水從西來注之

何氏云荷荷古通

荷水即沛

當作沛

水之所苞注以成湖澤也而東與泗

水合於湖陵縣西六十里穀庭城下俗謂之黃水口

黃水西北通巨野澤蓋以黃水沿注于荷故因以名

焉

按荷水入泗經言在方輿縣東注云在湖陵縣西必二縣以是水為界非有兩處也今魚臺縣北有

方輿故城縣東南有湖陵故城與沛縣接界湖陵秦置後漢章帝改曰湖陵

又屈東南過湖陸縣南洧涓水

宋本作涓涓水

從東北來流注

之

地理志曰故湖陵縣也荷水在南王莽更曰湖陸應

劭曰尚書一名湖陵

漢志應劭曰尚書一名湖無陵字

章帝封東平

王蒼子為湖陵侯更名湖陵也

後漢書郡國志云山陽郡湖陸故湖陵章

帝更名則此之湖陵當作湖陸

泗水又東逕郗鑒所築城北又東逕

湖陸城東南昔桓温北入也范曄擒慕容忠於此城

東有度尚碑泗水又左會南梁水地理志曰水出蕃

縣今縣之東北平澤出泉若輪焉發源成川西南流

分為二水北水枝西出逕蕃縣北西逕滕城北春秋  
左傳隱公十一年滕侯薛侯來朝爭長薛侯曰我先  
封滕侯曰我周之卜正也薛庶姓也我不可以後之  
公使羽父請薛侯曰君辱在寡人周諺有之曰山有  
木工則度之賓有禮主則擇之周之宗盟異姓為侯  
寡人若朝于薛不敢與諸任齒君若辱貶寡人則願  
以滕君為請薛侯許之乃長滕侯者也漢高帝封夏  
侯嬰為侯國號曰滕公鄧晨曰今沛郡公丘也其水

又漑公丘焉縣故城在滕西北按地理志即滕也周

懿王子錯叔繡文公所封也

漢書地理志沛郡公丘縣注云故滕國周懿王

子錯叔繡所封三十一世為齊所滅師古曰左氏傳云邾雍曹滕文之昭也系本亦云錯叔繡文王子而此志云懿王子未詳其義耳齊滅之秦以為縣漢武帝元朔三年

封魯恭王子劉順為侯國世以此水漑我良田遂及百

秭故有兩溝之名焉南梁水自枝渠西南逕魯國蕃

縣故城東俗以南隣於漑亦謂之西漑水南梁水又

屈逕城南應劭曰縣古小邾邑也地理志曰其水西

流注于沛

以下沛字何氏俱改沛

沛在湖陸西而左注西

疑作泗

泗沛合流故地記或言沛入泗泗亦言入沛互受通

稱故有入沛之文闕駟十三州志曰西至湖陸入泗

是也經無南梁之名而有洧

原本作洧下同

涓之稱疑即是水

也戴延之西征記亦言湖陸縣之東南有洧涓水亦

無記於南梁謂是吳王所道之瀆也余按湖陸西南

止自

宋本作有

是水延之蓋以國語云吳王夫差起師將

北會黃池掘溝於商魯之間北屬之沂西屬于沛以

是言故是水為吳王所掘非也余以水路求之止自  
泗川耳蓋北達沂西北逕於商魯而接於沛吳所浚  
廣耳非謂起自東北受沂西南注沛也假之有通非  
吳所趣年載誠眇人情厠近以今忖古知延之之不  
通情理矣泗水又南潄水注之又逕薛之上邳城西

漢志魯國薛縣而南注者也

又南過沛縣東

今屬江南徐州府元志沛縣泗水自西北流入東去縣五十步

昔許由隱於沛澤即是縣也縣蓋取澤為名宋滅屬

楚在泗水之濱於秦為泗水郡治黃水注之黃水出

小黃縣黃鄉黃溝國語曰吳子會諸侯於黃池者也

黃水東流逕外黃縣故城南

在今開封府杞縣東北漢志師古曰左氏傳曰

惠公伐宋師于黃杜氏以為外黃縣東有黃城即此地也又魏郡內黃縣注應劭曰春秋吳子晉侯會

于黃池今黃澤在縣西臣瓚曰國語曰吳子會諸侯于黃池掘溝于齊魯之間今陳留外黃有黃溝是也

史記曰伐宋取黃池然則不得在魏郡明矣師古曰瓚說是也應說失之張晏曰魏郡有

內黃縣故加外也薛瓚曰縣有黃溝故縣氏焉圈稱

陳留風俗傳曰縣南有渠水於春秋為宋之曲棘里



故宋之別都矣春秋昭公二十五年宋元公卒于曲

棘是也

杜預曰陳留外黃縣城中有曲棘里宋地

宋華元居于稷里宣公

十五年楚鄭圍宋晉解揚囚楚致命于此

左傳宣公十五年公

孫歸父會楚子于宋宋人使樂嬰齊告急于晉晉使解揚如宋使無降楚曰晉師悉起將至矣鄭人囚而獻之楚楚子厚賂之使反其言不許三而許宋人懼之登之樓車使呼宋人而告之遂致其君命

使華元乘闔夜入楚師登子反之床曰寡君使元以

病告弊邑易子而食析骨以爨城下之盟所不能也

子反退一舍宋楚乃平今城東闔上猶有華元祠祀

之不輟城北有華元冢黃溝自城南東逕蔡丘下春

秋僖公九年齊桓公會諸侯于葵丘宰孔曰

按傳當作宰孔

先歸遇晉侯曰可無會也齊侯不務德云云

齊侯不務德而勤遠畧北伐

山戎南伐楚西為此會東畧之不知西則否矣其在亂乎君務靖亂無勤於行晉侯乃還即此地也黃溝又東注大澤蒹葭莞葦生焉即世所謂大薺陂也陂水東北流逕定陶縣南

又東逕山陽郡

今兗州府

成武縣之楚丘亭北

今屬克州府

黃溝又東逕郟城

何氏云當

作

成武縣故城南王莽更之曰成安也黃溝又東

北逕郟城北春秋桓公二年經書取郟大鼎于宋戊申納于大廟左傳曰宋督攻孔父而取其妻殺殤公而立公子憑以郟大鼎賂公臧哀伯諫為非禮十三州志曰今成武縣東南有郟城俗謂之北郟者也黃溝又逕東平樂縣故城南又東右合泡水即豐水之上源也水上承大薺陂東逕貫城北又東逕己氏縣

故城北王莽之已善也縣有伊尹冢崔駰曰殷帝沃

丁之時時

衍

伊尹卒葬于薄皇覽曰伊尹冢在濟陰

已氏平利鄉

漢志已氏屬梁國郡國志屬濟陰平利鄉郡國志作平鄉

皇甫謐曰

伊尹年百餘歲而卒大霧三日沃丁葬以天子之禮

親自臨喪以報大德焉又東逕孟諸澤杜預曰澤在

梁國睢陽縣東北逕郟城縣故城南地理志曰山陽

縣也王莽更名之曰告城矣故世有南郟北郟之論

也又東逕單父故城南

今屬兗州府

昔密子賤之治也孔

子使巫馬期觀政入其境見夜漁者問曰子得魚輒  
放何也曰小者吾大夫欲長育之故也子聞之曰誠  
彼形此子賤得之善矣惜哉不齊所治者小也王莽  
更名斯縣為利善矣

何氏云善當作父

世祖建武十三年封

劉茂為侯國又東逕平樂縣右合泡水

漢志作色水下同

上承濰水於下邑縣

今為夏邑縣屬歸德府

界東北注一水上

承濰水於杼秋縣界

故城在徐州府蕭縣西七十里

北流世又謂之

瓠盧溝水積為渚渚水東北流二渠雙引左合澧水

俗謂之二泡也。自下澧泡並得通稱矣。故地理志曰：平樂侯國也。泡水所出，又逕豐西澤，謂之豐水。漢書稱高祖送徒麗山，徒多亡，到豐西澤，有大蛇當徑，拔劍斬之。此即漢高祖斬蛇處也。又東逕大堰水，分為二。又東逕豐縣故城南。州今屬徐州府王莽之吾豐也。水側城東北流，右合枝水，上承豐西大堰，派流東北，逕豐城北。東注澧水，澧水又東合黃水。時人謂之狂水，蓋狂黃聲相近，俗傳失實也。自下黃水，又兼通稱矣。水

上舊有梁謂之泡橋王智深宋史云宋太尉劉義恭

於彭城遣軍王

朱云舊本作軍王吳本改作軍正並誤當作軍主六朝時每謂將帥為軍

主如梁書韋燦令軍主鄭逸逆擊侯景是其例也

稽元敬北至城覘候魏軍魏軍

於清西望見元敬士衆魏南康侯杜道儁引趣泡橋

沛縣民逆燒泡橋又於林中打鼓儁謂宋軍大至爭

渡泡水水深酷寒凍溺死者殆半清水即泗水之別

名也沈約宋書稱魏軍欲渡清西非也泡水又東逕

沛縣故城南秦末兵起蕭何曹叅迎漢祖於此城高

帝十一年封合陽侯劉仲子為侯國城內有漢高祖廟廟前有三碑後漢立廟基以青石為之階陛尚存劉備之為徐州也治此袁術遣紀靈攻備備求救呂布布救之屯小沛招靈請備共飲布謂靈曰玄德布弟也布性不喜合鬪但喜解鬪乃植戟於門布彎弓曰觀布射戟小支中者當各解兵不中可留決鬪一發中之遂解此即布射戟支處也述征記曰城極大四周塹通豐水豐水於城南東注泗即泡水也地理



志曰泡水自平樂縣東北至沛漢志作沛入泗者也泗水

南逕小沛縣東縣治故城南坨上東岸有泗水亭漢

祖為泗水亭長即此亭也元和志泗水亭在沛縣東南一里按寰宇記沛縣東

南微山下有故沛城尚存後漢書呂布傳注云小沛即沛縣也故亭今有高廟廟前

有碑延熹十年立廟闕崩褫畧無全者水中有故石

梁處遺石尚存高祖之破黥布也過之置酒沛宮酒

酣歌舞慷慨傷懷曰遊子思故鄉也泗水又東南逕

流廣戚縣故城南在今沛縣東北漢武帝元朔元年封劉澤

為侯國

史表元朔元年封魯恭王子擇為廣戚侯漢表作劉將今云澤誤

王莽更之

曰力聚也泗水又逕留縣而南逕垞城東

元和志故留城在沛

縣東南五十五里故垞城在彭城縣北二十六里兗州人謂實中城曰垞也今徐州北有垞城垞音茶

城西南有崇侯虎廟道淪遺愛不知何因而遠有此

圖泗水又南逕宋大夫桓魋冢西山抗泗水上而盡

石鑿而為冢今人謂之石郭者也郭有二重石作工

巧夫子以為不如死之速朽也

又東南過彭城縣東北

泗水西有華龍寺是沙門釋法顯遠出西域浮海東

還持龍華圖首創此制法流中夏自法顯始也其所

持天基二石仍在南陸

上下疑有訛字

東基堪中其石尚光

潔可愛泗水又南淮水入焉而南逕彭城縣故城東

故城在今徐州東南

周顯王四十二年九鼎淪沒泗淵秦始皇

時而鼎見於斯水始皇自以德合三代大喜使數千

人投

疑作沒

水求之不得所謂鼎伏也亦云系而行之未

出龍齒齧斷其系故語曰稱樂大早絕鼎系當是孟

浪之傳耳泗水又逕龔勝墓南墓碣尚存又經亞父

冢東皇覽曰亞父冢在廬江縣郭東

今在徐州城南

居巢亭

中有亞父井吏民親事皆祭亞父於居巢亭上後更  
造祠於郭東至今祀之按漢書項羽傳歷陽人范增  
未至彭城而發疽死不言之居巢今彭城南有項羽  
掠馬臺臺之西南山麓上即其冢也增不慕范蠡之  
舉而自絕於斯可謂褊矣推考書墓事近於此也

又東南過呂縣南

呂宋邑也春秋襄公元年晉師伐鄭及陳楚子辛救  
鄭侵宋呂留是也縣對泗水漢景帝三年有白頸烏  
與黑烏羣鬪於縣白頸烏不勝墮泗水中死者數千  
京房易傳曰逆親親厥妖白黑烏鬪時有吳楚之反  
泗水之上有石梁焉故曰呂梁也昔宋景公以弓工  
之弓彎弧東射矢集彭城之東飲羽於石梁即斯梁  
也懸濤瀟瀆實為泗嶮孔子所謂魚鼈不能遊又云  
懸水三十仞流沫九十里今則不能也

元和志呂梁  
在彭城縣東

南五十七里按今徐州北有呂梁故城州志呂梁山  
在州東南五十里山下即呂梁洪也有上下二洪相  
去凡七里巨石齒列波濤洶湧明嘉靖二十三年蓋  
管河主陳洪範鑿呂梁洪平之自是運道益便

惟嶽之喻未便極天明矣晉太康地記曰水出磬石  
書所謂泗濱浮磬者也泗水又東南流丁溪水注之  
溪水上承泗水於呂縣東南流北帶廣隰山高而注  
于泗川泗水冬春淺澀常排沙通道是以行者多從  
此溪即陸陸下疑  
有璣字賦所云乘丁水之捷岸排泗川之  
積汝者也晉太元九年左將軍謝玄於呂梁遣督護

聞人爽用功九萬擁水立七拖以利運漕者

朱云拖當作埭

晉書謝玄傳用督護聞人爽謀堰呂梁水樹柵立七埭為派擁二岸之流以利運漕

又東南過下邳縣西

今為淮安府邳州

泗水歷縣逕葛嶧山東

元和志嶧陽山在下邳縣西六里泗水西自彭城縣界流

入即奚仲所遷邳嶧者也泗水又東南逕下邳縣故

城西

不邳故城在今邳州東三十里

東南流沂水流納注焉故東海

屬縣也應劭曰奚仲自薛徙居之故曰下邳也漢徒

齊王韓信為楚王都之後乃縣焉王莽之澗

漢志澗作閏

矣東陽郡治文潁曰秦嘉

下疑有脫字

東陽郡今下邳是

也晉灼曰東陽縣本屬臨淮郡明帝分屬下邳後分屬廣陵故張晏曰東陽郡今廣陵郡也漢明帝置下邳郡矣城有三重其大城中有司馬石苞鎮東將軍胡質司徒王渾監軍石崇四碑南門謂之白門魏武擒陳宮於此處矣中城呂布所守也小城晉中興北中郎將荀羨都曇所治也昔太山吳伯武少孤與弟文章相失二十餘年遇於縣市文章欲歐伯武心神



悲痛因相尋問乃兄弟也

風俗通云泰山吳文章少與伯武相失二十年後會

下邳市爭鬥伯武歐之文章不忍報更相借問乃親兄也文章後官陳留太守縣為沂泗之

會也又有武原水注之水出彭城武原縣西北會注

陂南逕其城西王莽之樂亭也縣東有徐廟山山因

徐徙以即名之也山上有石室徐廟也武原水又南合

武水謂之泗水南逕剛亭城又南至下邳入泗謂之

武原水口也又有桐水出西北東海容丘縣東南至

下邳入泗泗水東南逕下相縣故城東王莽之從德

也城之西北有漢大尉陳球墓墓前有三碑是弟子  
管寧華歆等所造初平四年曹操攻徐州破之拔取  
慮睢夏丘等縣以其父避難被害於此屠其男女十  
萬泗水為之不流自是數縣人無行跡亦為暴矣泗

水又東南得睢水口泗水又逕宿預城之西

今宿遷縣東南

有宿預故城

又逕其城南故下邳之宿留縣也王莽更名

之曰康義矣晉元皇之為安東也督運軍儲而為邸  
閣也魏太和中南徐州治後省為成梁將張惠紹北

入水軍所次憑固斯城更增修郭壘其四面引水環之今城在泗水之中也

又東南入于淮

泗水又東逕陵柵南西征記曰舊陵縣之治也

漢志泗水

國有凌縣其故城在今宿遷東南

泗水又東南逕淮陽城

今桃源縣西北有淮

陽故城北臨泗水昔苗丘訢飲馬斬蛟眇目於此處

也韓詩外傳東海有勇士苗丘訢過神泉飲馬馬為蛟所取訢拔劍入水三日三夜殺二蛟而出雷神

隨而擊之眇其左目吳越春秋作椒丘云訢為齊王使吳過淮津飲馬于淮水神取其馬訢大怒袒褐持

劍入水求神大戰連日乃出眇其一目 泗水又東南逕魏陽城北城枕

泗川陸機行思賦曰行魏陽之枉渚故無魏陽疑即

泗陽縣故城也今在桃源縣東王莽之所謂淮平亭矣蓋魏

文帝幸廣陵所由或因變之未詳也泗水又東逕角

城北角城縣晉義熙中置故城在今清河縣西南而東南流注于淮考諸

地說或言泗水於睢陵入淮亦云於下相入淮皆非

實錄也禹貢錐指曰泗水故道自徐城以南悉為黃河所占而淮不得擅會泗之名矣

沂水出泰山蓋縣艾山蓋縣故城在青州府沂水縣西北七十里齊蓋邑漢置縣屬秦

山郡隋嘗于此置東安縣

鄭康成云出沂山亦或云臨樂山水有三源南源所

導世謂之柞泉北水所發俗謂之魚窮泉俱東南流

合成一川

禹貢錐指曰齊乘曰鄭康成云沂水出沂山按今蒙陰縣東北地名南河川小阜之

下有曰狗泉此沂源也東南逕馬頭固山有泉東流與之合北望沂山五十里殊無別源疑沂山水源古流今竭耳明萬歷中傅履重著水利論曰沂源出蒙陰魯艾諸山皆涓滴細流自石罅中出經數十里近縣稍大而河形散漫不可灌溉渭按東鎮沂山在今青州府沂水縣北一百十里接臨朐縣界寰宇記云即東泰山也無沂源又雕崖山在縣西北一百七十里南接蒙陰縣界去縣治一百三十里沂水于此發

源是謂狗泉蓋即康成所謂沂山也黃子鴻云周禮青州鎮曰沂山鄭康成謂沂水所出今沂水實出雕崖山北去東泰山尚五十餘里則古沂山當即指此隋唐時始移沂山之名于東泰山而祀之以為東鎮其實二山不可混也子鴻此言甚覈臨樂艾山雕陰疑即沂山支阜之異名山跨蒙沂二縣之境故縣志各載為沂源耳齊魯之所謂狗泉者即北濟之魚窮泉其出馬頭固山者即南源之柞泉也

右會

洛預水水出洛預山東北流注之沂水東南左合桑

預水水北出桑預山東流

一作注

于沂水沂水又東南

螳螂水入焉出魯山東南流右注沂水沂水又東逕

蓋縣故城南東會連綿之水水發連綿山南流逕蓋

城東而南入沂沂水又東逕浮來之山今在莒州西三十里一名

公來又春秋經書公及莒人盟于浮來者也即公來名浮丘

山也在邳鄉西故號曰邳來之間也浮來之水注之

其水左控三川右會甘泉而注于沂沂水又南逕爆

山西山有二峯相去一里雙巒齊秀員峙若一沂水

又東南逕東苑當作東莞下同漢志東莞縣屬琅邪郡今為沂水縣治縣故城

西與沂水合孟康曰縣故鄆邑今鄆亭是也按漢志孟康曰

縣故鄆邑今鄆亭是也此云漢武帝元朔二年封城

鄆誤今沂水縣北有故鄆城

水經注集釋訂訛

陽共王弟

史記作子

吉為東苑侯

按史漢表俱作東苑侯

魏文帝黃

初中立為東莞郡

按晉書地志云太康元年分琅邪置東莞郡統縣八一日東莞故魯

鄆邑也此云黃初中立未詳

東燕錄謂之圍城劉武帝北伐廣固

登之以望王難

朱云王難字誤當作五龍廣固有五龍口塞其口則城必陷詳具二十六

魏南青州治左氏傳曰莒魯爭鄆為日多矣

宋本作久

矣今城北鄆亭是也京相璠曰琅邪姑幕縣

姑幕故城在莒

州境內漢縣屬琅邪郡北齊省入東莞

南四十里員亭故魯鄆邑世變

其字非也郡國志東莞有鄆亭今在圍城東北四十



里猶謂之故東莞城小沂水出黃孤山西南流逕其城北西南注于沂沂水又南與閭山水合水出閭山

東南流右佩二水總歸於沂沂水南逕東安縣故城

東

在今沂水縣南五十里

而南合時密水水出時密山莒地莒

人歸共仲于魯及密而死是也密水東流逕東安城

南漢封魯孝王子強為東安侯

漢志東安縣屬東海郡王子侯表甘露四

年封魯共王子強為東安侯

密水又東南流入沂沂水又南桑泉

水北出五女山東南流巨圍水注之水出巨圍之山

東南注于桑泉水桑泉水又東南堂阜水入焉其水  
導源堂阜春秋莊公九年管仲請囚鮑叔受之及堂  
阜而稅之杜預曰東莞蒙陰縣西北有夷吾亭者是  
也堂阜水又東南注桑泉水桑泉水又東南逕蒙陰  
縣故城北王莽之蒙恩也又東南與叟崗水合水有  
二源雙會東導一川俗謂之汶水也東逕蒙陰縣注  
桑泉水又南東盧川水注之水出鹿嶺山東南流左  
則二川臻湊右則諸葛泉源斯

疑

奔亂流逕城陽之

盧縣故蓋縣之盧上里也漢武元朔二年封城陽共

王弟劉稀為侯國

按漢志城陽國有盧縣而無盧縣王子侯表劉稀封雷侯屬東海郡

東海昌慮下云侯國此即稀所封之邑也師古曰音盧若盧則屬之泰山郡詳上文蒙陰下文蓋縣句二縣俱屬泰山郡則此之盧縣當是泰山郡之盧縣無疑然又非劉稀所封之邑且慮雷古字通用若東海昌慮城陽之慮縣與雷不通實所不解至道元以城陽之慮縣為劉稀之封邑尤為無據王莽更

名之曰著善矣又東南注于桑泉水桑泉水又東南

右合蒙陰二水水出蒙陰山東北流昔瑯邪承宮避

亂此山立性好仁不與物競人有認其黍者舍之而

去

東觀漢記承官將妻子入華蓋蒙陰山谷耕其水種禾黍人有認其黍者亦不與競捨之而去

東北流入于沂沂水又南逕陽都縣故城東

在今沂水縣西

南

縣故陽國也齊同盟齊利其地而遷之者也漢高

帝六年封將軍丁復為侯國沂水又南與蒙山水合

水出蒙山之陰東流逕陽都縣南東注沂沂水又左

合溫水水上承溫泉陂而西南入于沂水者也

南過瑯邪臨沂縣東又南過開陽縣東

沂水南逕中丘城西春秋隱公七年夏城中丘左傳

曰書不時也沂水又南逕臨沂縣故城東

城在今沂州北

國志曰瑯邪有臨沂縣故屬東海郡有治水

德清胡渭曰舊

本作洛水當從漢志改作治水下同按漢志泰山郡南武陽冠石山治水所出南至下邳入泗注之

外出太山南武陽縣之冠石山地理志曰冠石山治

水所出應劭地理風俗志曰武水出焉蓋水異名也

東流逕蒙山下有蒙祠治水又東南逕顓臾城北郡

國志曰縣有顓臾城

在費縣西北九十里

季氏將伐之孔子曰

昔者先王以為東蒙主社稷之臣也何以伐為冉有

曰今夫顓臾固而便近於費者也治水又東南流逕

費縣故城南

今屬兗州府故城在縣西北二十里

地理志東海之屬縣

也為魯季孫之邑子路將墮之公山弗擾率師襲魯

弗克後季氏為陽虎所執弗擾以費畔即是邑也漢

高帝六年封陳賀為侯國王莽更名之曰順從也許

慎說文云沂水出東海費縣東西入泗

東西字疑有訛誤字典引

此作西南入泗

從水斤聲呂忱字林亦言是矣斯水東南所

注者沂水在西不得言東南趣也皆為謬矣故世俗

謂水為小沂水

宋慶歷間沂州修城碑云大小二沂環流外轉而小沂尤瀉于西北平日

波如簞紋清淺可愛及山雨水至如百萬陣馬摩壘而來謂此水也治水又東南逕

城南春秋隱公八年鄭伯請釋太山之祀而祀周公

使宛歸泰山之祊而易許田杜預釋地曰祊鄭祀泰

山之邑也在瑯邪費縣東南治水又東南流注于沂

沂水又南逕開陽縣故城東

在今沂州北

縣故鄆國也春

秋左傳昭公十八年邾人襲鄆盡俘以歸鄆子曰余無

歸矣從孥于邾是也後更名開陽矣春秋哀公三年

經書季孫斯叔州仇帥師城啟陽者是矣縣故瑯邪郡治也

又東過襄賁縣東

今沂州東南有襄賁故城賁音肥

屈從縣南西流又

屈南過郊縣西

魯連子稱陸子謂齊湣王曰魯費之衆臣甲舍于襄賁者也王莽更名章信也郊故國也少昊之後春秋昭公十七年郊子朝魯公與之宴昭子叔孫婁問曰少昊鳥名官何也郊子曰吾祖也我知之黃帝炎帝



以雲火紀官太皞以龍紀少皞瑞鳳鳥統歷鳥官之

司議政斯在孔子從而學焉既而告人曰天子失官

學在四夷者也

此與左傳稍異

竹書紀年晉烈公四年越子

末句滅郊以郊子鵠歸

竹書紀年作烈公六年於越子朱句滅郊以郊子鵠歸

縣故舊魯也東海郡治秦始皇以為郊郡漢高帝二年更從今名即王莽之沂平者也

又南過良城縣西

今邳州北有良城縣故城

又南過下邳縣西

今邳州東

三十里有下邳故城

南入于泗

春秋左傳曰昭公十三年秋晉侯會吳子于良吳子  
辭水道不可以行晉乃還是也地理志曰良城王莽  
更名承翰矣沂水於下邳縣北西流分為二水一水  
於城北西南入泗一水逕城東屈從縣南亦注泗謂  
之小沂水水上有橋徐泗間以為圯昔張子房遇黃  
石公於圯上即此處也

邳州志曰沂河舊在州西一里今其道為黃流於塞水自

邳城入運河

建安二年曹操圍呂布於此引沂泗灌城而

擒之

禹貢雖指曰以今輿地言之沂水出沂水縣歷沂州邳城至邳州合泗水又東南至清河縣入

淮

洙水出泰山蓋縣臨樂山

地理志曰臨樂山洙水所出西北至蓋入泗水或作  
池字蓋字誤也洙水自山西北逕蓋縣漢景帝中元  
五年封后兄信為侯國又西逕太山東平陽縣春秋  
宣公八年冬城平陽杜預曰今太山平陽縣是也河  
東有平陽故此加東矣晉武帝元康九年改為新泰  
縣也

西南至卞縣入于泗

洙水西南流盜泉水注之泉出卞城東北卞山之陰

尸子曰孔子至於暮矣

按尸子作孔子至于勝母暮矣而不宿勝母縣名此漏勝

母二字不宿下漏至字

而不宿于盜泉渴矣而不飲惡其名也

故論撰考識曰水名盜泉仲尼不漱即斯泉矣西北

流注于洙水洙水又西南流于卞城西泗水亂流西

南至魯縣東北又分為二水水側有故城兩水之分

會也洙水西北流逕孔里此是謂洙泗之間矣春秋

之浚洙非謂始導矣蓋深廣之耳洙水又西南枝津  
出焉又南逕瑕丘城東而南入石門門右結石為水  
門跨於水上也西南流世謂之杜武溝洙水又西南  
逕南平陽縣之顯閭亭西邾邑也春秋襄公二十一  
年經書邾庶其以漆閭丘來奔者杜預曰平陽北有  
顯閭亭十三州記曰山陽南平陽縣又有閭丘鄉從  
征記曰杜謂顯閭丘也今按漆鄉在縣東北十里見  
有閭丘鄉顯閭非也然則顯閭自是別亭未知孰是

入南洸水注之呂忱曰洸水出東平上承汶水於崗縣西闡亭東爾雅曰汶別為闡其曰洛之波矣洸水

西南流逕盛鄉城西京相璠曰崗縣西南有盛鄉城

者也又南逕太山寧陽縣

今屬兗州府

故城西漢武帝元

朔三年封魯恭王子劉恬

按史表當作劉恢

為侯國王莽改

之曰寧順也又南洙水枝津注之水首受洙西南流

逕瑕丘城北又西逕寧陽城南又西南入于洸水洸

水又西南逕太山郡乘丘縣故城東趙肅侯二十年

韓將舉與齊魏戰于桑丘即此縣也

史記趙世家肅侯二十三年韓

舉與齊魏戰死于桑丘注曰地理志云泰山有桑丘縣正義曰括地志云桑丘城在易州遂城縣界或云在泰山非也此時齊伐燕桑丘三晉皆來救之不得在泰山有桑丘縣此說甚誤云云炳巽按泰山郡有桑丘縣恐是史誤乘作桑耳漢武帝元朔五年封中山靖王子劉

將夜侯國也洸水又東南流注于洙水

又上當有洙水字又

南至高平南入于泗水西有茅鄉城東去高平三十里京相璠曰今高平縣西三十里有故茅鄉城者也

水經注集釋訂訛卷二十五



欽定四庫全書

水經注集釋訂訛卷二十六

歸安沈炳巽撰

沫水 巨洋水 溜水

汶水 濰水 膠水

沫水出琅耶東莞縣西北山

漢志作術水琅邪郡東莞縣術水南至下邳入泗過

郡三行七百一十里青州寢師古曰術水即沫水也明一統志沫水源出沂山流經沂水縣東北達莒州界入

沂州

大棄山

當作大弁山明一統志大弁山在沂水縣西北一百九十里

與小太山連

麓而異名也引控衆流積以成川東南流逕邳鄉南

南去縣八十許里城有三面而不周於南故俗謂之

半城沫水又東南流左右

疑作合

峴水水出大峴山

在臨

胸縣東南一百五里劉宋武帝伐南燕渡大峴即此

東南流逕邳鄉東東南流

注

原本譌

于沫水也

東南過其縣東

沫水左與箕山之水合水出東

疑行

諸縣

本為諸城縣屬青州

西箕山劉澄之以為許由之所隱也更為巨謬矣其  
水西南流注于沫水也

又東南過莒縣東

今為莒州  
屬青州府

地理志曰莒子之國盈姓也少昊後列女傳曰齊人  
杞梁殖襲莒戰死其妻將赴之道逢齊莊公公將弔  
之杞梁妻曰如殖有罪君何辱命焉如殖無罪有先  
人之弊廬在下妾不敢與郊弔公旋車弔諸室妻乃

哭於城下七日而城崩

列女傳云齊莊公襲莒杞梁殖  
戰而死莊公歸遇其妻使弔于

路祀梁妻曰有先人之敝廬在莊故琴操云殖死妻公乃還車詣其室成禮然後去

援琴作歌曰樂莫樂兮新相知悲莫悲兮生別離哀感皇天城為之墜即是城也其城三重並悉崇峻唯南開一門內城方十二里郭周四十許里尸子曰莒君好鬼巫而國亡無知之難小白奔焉樂毅攻齊守嶮全國秦始皇縣之漢興以為城陽國封朱虛侯章治莒王莽之莒陵也光武合城陽國為琅耶國以封皇子京雅好宮室窮極伎巧壁帶飭以金銀明帝時

京不安菑移治閭陽矣

後漢書作章帝時又云移治開陽

沫水又南

表公水

朱本云當作表公水

東出清山尋坤維而注沫沫水又

南潯水注之水出於巨公之山西南流舊竭以漑渚

田東西二十里南北十五里潯水又西南流入沫沫

水

原本又南與葛陂水會水發三注

何氏云注疑作柱

山西

南流逕辟城南世謂之辟陽城史記建元以來王子

侯者年表曰漢武帝元符二年

漢無元符當作元朔漢表元朔二年封城

陽共王子壯為壁侯謚曰節

封城陽共王子節侯劉壯為侯國也

其水於邑積以為陂謂之辟陽湖西南流注于沫水也

又南過陽都縣東入于沂

沂水縣西南有陽都故城齊乘曰水出沂山東麓傳履重

水利論曰沅水汎濫奔潰淤沙彌望竭力修築隨復淤塞

沫水自陽都縣又南會武陽溝水水東出倉山山上

有故城世謂之監官城非也即古有利城矣漢武帝

元朔四年封城陽共王子劉釘為侯國也其城因山

為基水導山下西北流謂之武陽溝又西至即丘縣

注于沫水又南逕東海郡即丘縣故春秋之祝丘也桓公五年經書齊侯鄭伯如紀城祝丘左傳曰齊鄭朝紀欲襲之漢立為縣王莽更之就信也郡國志

曰自東海分屬琅邪闕駟曰即祝魯之音蓋字承讀

變矣沫水又南逕東海厚丘縣

今為淮南府沭陽縣故城在縣北六十里

王莽更之祝其亭也分為二瀆

齊乘曰沫水自厚邱縣分為二今名南連

北連也西南出今無水世謂之枯沫一瀆南逕建陵縣

故城東

故城在沭陽縣西北一百五里建陵山下

漢景帝八年封石綰為

侯國

按漢表景帝六年封衛綰為建陵侯此云八年及石綰皆誤

王莽更之曰付

亭也沐水又南逕陵山西魏正元中齊王之鎮徐州

也立大堰遏水西流兩瀆之會置城防之曰曲沫戍

流三十里西注沫水舊瀆謂之新渠自厚邱西南出

左會新渠南入淮陽宿預縣

今宿遷縣

注泗水地理志所

謂至下邳注泗者也

下邳故城在今邳州東三十里有直河入泗即古沫水也經

言於陽都入沂非矣沫水左瀆自大堰水斷故瀆東

南出桑堰水注之水出襄賁縣泉流東注沫瀆又南



左合橫溝水水發瀆右東入沭之故瀆又南暨于堰

其水西南流逕司吾山東又逕司吾縣故城西

今宿遷北

有司吾故城

春秋左傳楚執鍾吾子

漢志應劭曰吳執鍾吾子

以為司

吾縣王莽更之息吾也又西南至宿預注泗水也沭

水故瀆自下堰東南逕司吾城東又東南歷祖口

城中祖水出于楚之祖地春秋襄公十年經書公

與晉及諸侯會吳于祖

杜預曰楚地音莊加反

京相璠曰宋

地今彭城偃陽縣西北有祖水溝去偃陽八十里

東南流逕偃陽縣故城東北地理志曰故偃陽國也  
春秋左傳襄公十年夏四月戊午會于柤晉荀偃士  
丐請伐偃陽而封宋向戌焉荀瑩曰城小而固勝之  
不武弗勝為笑固請丙寅圍之弗克孟氏之臣秦董  
父輦重如役偃陽人啓門諸侯之士門焉懸門發聊  
人紇挾之以出門者狄虎彌建大車之輪而蒙之以  
甲以為櫓左執之右拔戟以成一隊孟獻子曰詩所  
謂有力如虎者也主人懸布董父登之及堞而絕之

墜則又懸之蘓而復上者三主人辭焉乃退帶其斷  
以徇於軍三日諸侯之師久於偃陽請歸智伯怒曰  
七日不克爾乎取之以謝罪也偃士攻之親受矢石  
遂滅之以偃陽子歸獻于武宮謂之夷俘偃陽妘姓  
也漢以為縣漢武帝元朔三年封齊孝王子劉就為  
侯國王莽更之輔陽也按史表劉就封博陽侯索隱曰志屬汝南漢志汝南郡博  
陽侯國莽曰樂家此云封偃陽未詳按偃陽即漢志  
博陽屬楚國莽曰輔陽郡國志屬彭城國有粗水左  
傳襄公十年滅偃陽杜預曰即此縣也據此則博陽  
與博陽自是兩縣而酈注乃以博陽屬之傳陽何耶

郡國志曰偃陽有柎水柎水而疑作南亂於沂而注

于沫謂之柎口城得其名矣東南至朐縣入游注海

也禹貢錐指曰以今輿地言之沫水出沂水縣厯莒州沂州郟城至沫陽縣西北分為二水其一南至

邳州入泗即齊乘所謂南連水也其一為左瀆北至海州與安東之游水合自下游沫通稱又北至贛榆

入海即齊乘所謂北連水也

巨洋水出朱虛縣泰山北過其縣西

泰山即東小泰山也巨洋水即國語所謂具水矣素

宏謂之巨昧王韶之以為巨寢何氏從通鑑注改寢亦或曰朐

瀾皆一水也而廣其目焉其水北流逕朱虛縣故城

西

朱虛故城在今青州府臨朐縣境漢縣屬琅邪郡後漢屬北海國隋省入郿城唐省郿城入安邱

漢惠帝二年封齊悼惠王子劉章為侯國地理風俗

記曰丹山在西南丹水所出東入海丹水由朱虛邱

阜矣故言朱虛城西有長坂遠峻名為破車峴城東

北二十里有丹山世謂之几山

在今濰縣西南八十里山形如几西丹水

發源于此縣在西南非山也丹几字相類音從字變也

漢志

朱虛縣几山丹水所出東北至壽光入海山藁丹水有二源各藁一山世

謂之東丹西丹水也西丹自穴山北流逕劇縣故城

東東丹水注之出方山

在今昌樂縣東二十里東丹水發源于此

山有三

水一水即東丹水也北逕縣合西丹水而亂流又東

北出逕薄澗北澗水亦出方山流入平壽縣積而

為渚水盛則北

朱云當作注

東南流屈而東北流逕平壽

縣故城西

平壽故城在今登州府濰縣西南三十里漢縣屬北海郡隋廢

而北入丹

謂之魚合口丹水又東北逕望

望下疑漏海字今萊州府有望海臺疑即

此也詳見後又東北入于海

臺東東北注海蓋亦縣所氏者也

又北過臨朐縣東

巨洋水自朱虛北入臨朐縣熏冶泉水注之

熏冶泉在臨朐

縣西南二十五里昔歐治子鑄劍之地

水出西溪飛泉側瀨於窮坎之

下泉溪之上源麓之側有一祀目之為冶泉祀按廣雅

金神謂之清明斯地蓋古冶官所在故水取稱焉水

色澄明而清冷特異淵無潛石淺鏤沙文中古壇

參差相對後人微加功飭以為嬉遊之處南北還岸

凌空踈木交合先公以太和中作鎮海岱余總角之

年持節東州至若炎夏火流閑居倦想提琴命友嬉

娛永日桂筍尋派

朱云當作桂棹尋波

輕林委浪琴歌既洽懽

情亦暢是焉棲寄實可憑衿小東有一湖佳饒鮮筍

匪直芳齊勺藥實亦潔並飛鱗其水東北流入巨洋

謂之熏冶泉又逕臨朐縣故城東城古伯氏駢邑也

漢武帝元朔二年封菑川懿王子劉奴為侯國應劭

曰臨朐山名也故縣氏之朐亦水名其城側川臨朐

是以王莽用表厥稱焉其城上下泚水悉是劉武皇



北伐廣固營壘所在矣

明一統志廣固城在今青州府城西堯山之陽晉永嘉後

前趙于此築城有大澗甚廣因之為固故名後為宋武帝所夷巨洋又東北逕委粟

山東

在今臨朐縣東北三里

孤阜秀立形若委粟又東北洋水

注之水西出石膏山西北石澗口東南逕逢山下祠

在今臨朐縣西二十五里山麓有殷諸侯逢伯陵祠故名

西洋水又南東歷逢山

下即石膏山也

在今青州府城西南二十里石色潤澤如膏故名麓麓上疑有脫文

三成壁立直上山上有石鼓鳴則年凶郭緣生續述

征記曰逢山在廣固南三十里有祠并石鼓齊地將

亂石人輒打石鼓聞數十里洋水歷其陰而東北流  
世謂之石溝水東北流出於委粟山北而東注于巨  
洋謂之石溝曰疑作然是水下流亦有時通塞及其  
春夏水泛川濶無輟亦或謂之為龍泉水地理志石  
膏山洋水是出也今於此縣唯是瀆當之似符羣證  
矣巨洋又東北得邳泉口泉源西出平地東流注于  
巨洋巨洋又北會建德水水西發逢山阜而東流入  
巨洋水也

又北過劇縣西

明一統志壽光縣西南三十里有紀城春秋紀國城中有臺俗曰紀臺城旁有

劇城漢之劇縣也

巨洋水又東北合康浪水

明一統志源出臨淄縣西一十里平地北流與系水

合水發縣西南嶼山無事樹木而員峭孤峙巔峴分

立左思齊都賦曰嶼嶺其左是也康浪水北流注于

巨洋巨洋又東北逕劇縣故城西古紀國也春秋莊

公四年紀侯不能下齊以與弟季大去其國違齊難

也後改曰劇故魯連子曰胸劇之人辨者也漢文帝

十八年別為菑川國後并北海漢武帝元朔二年封

菑川懿王子劉錯為侯國王莽更之愈縣也城之北

側有故臺臺西有方池晏謨曰西去齊城九十七里

耿弇破張步於臨淄追至巨洋水上僵尸相屬即是

水也巨洋又東北逕晉龍驤將軍幽州刺史辟閭渾

墓東而東北流渾墓側有一墳甚高大時人咸謂之

為焉陵一作馬陵而不知誰之邱壟也巨洋水又東北逕

益縣故城東益縣故城在今壽光縣南十里漢屬北海郡寰宇記以為魏益都城非也益都

城在縣西  
二十里

王莽更之滌蕩也

按漢志莽曰探陽

晏謨曰南去

齊城五十里司馬宣王伐公孫淵北徙豐人住於此城遂改名為南豐城也又東北積而為潭枝津出焉謂之百尺溝西北流逕北益都城也漢武帝元朔三年封菑川懿王子劉胡為侯國又西北流而注于巨

淀矣

朱云當作巨洋

又東北過壽光縣西

今屬青州府

巨洋水自湖東北流逕縣故城西王莽之翼平亭也

漢光武建武二年封更始子鯉為侯國城之西南水  
東有孔子石室故廟堂也中有孔子像弟子問經既  
無碑誌未詳所立巨洋又東北流堯水注之水出劇  
縣南有崩山即故義山也俗人以其山角因名為角  
崩山亦名為角林山皆世俗音訛也水即蕤水矣地  
理志曰劇縣有義山蕤水所出也地理志曰劇縣義山蕤水所出北注  
壽光入海北逕嶼山東俗亦名之為青水矣堯水又東北  
逕東西壽光二城間應劭曰壽光縣有灌亭杜預曰

在縣東南斟灌國也

斟灌城在壽光縣東四十里

又言斟亭在平

壽縣東南平壽故城

平壽故城在今萊州府濰縣西南三十里漢縣屬北海郡隋廢

在白狼水西今北海郡治水上承營陵縣今為昌樂縣之

下流東北逕城東西入別畫湖亦曰朕懷湖湖東西

二十里南北三十里東北入海斟亭在漑水東斟亭在今

濰縣東北三十里水出桑犢亭東覆甌山亭故高密郡治世

謂之故郡城山謂之塔山水曰鹿孟水亦曰戾孟水

皆非也地理志曰桑犢故亭北海之屬縣矣有覆甌

山澗水所出北逕斟亭西北今曰

疑作白

狼水按地理

志北海有斟縣京相璠曰故斟尋國禹後西北去灌

亭九十

十下當有里字朱云當作九里

澗水又北逕寒亭西郡國志

曰平壽有

疑作在

斟灌東

郡國志北海國平壽縣有斟城有寒亭

薛瓚漢

書集注云按汲郡古文相居斟灌東郡灌是也明帝

以封周後改曰衛斟尋在河南非平壽也又云太康

居斟尋羿亦居之桀又居之尚書序曰太康失國兄

弟五人徙于洛汭此即太康之居為近洛也余考瓚



所據今河南有尋也

疑譌當作邑

衛國有觀土國語曰啓

有五觀謂之姦子五觀蓋其名也所處之邑其名曰

觀皇甫謐曰衛也又云夏相徙南邱依同姓之諸侯

于斟灌斟尋氏即汲冢書云相居斟灌也既依斟尋

明斟尋非一居矣窮后既仗善射篡相寒浞亦因逢

蒙弑羿即其居以生澆因其室而有殪故春秋襄公

四年魏絳曰使澆用師滅斟灌及斟尋氏處澆于過

處殪于戈

杜預曰過戈皆國名東萊掖縣北有過鄉戈在宋鄭之間

是以伍員言

於吳子曰過澆殺斟灌以伐斟尋是也有夏之遺臣  
曰靡事羿羿之死也逃于高氏今隔縣也收斟灌尋  
二國之餘燼殺寒浞而立少康滅之有窮遂亡也是

蓋寓其居而生其稱

上下疑有譌誤

宅其業而表其邑縱遺

文公禠亭郭有傳未可以彼有灌目謂此

疑衍

專此

為

為下疑有脫文宋本作未可  
以彼為灌目謂專此為非

捨此尋名而專彼為

是以上

疑為

推傳應氏之據亦可按矣堯水又東北

注巨洋伏琛晏謨並言堯嘗頓駕於此故受名焉非

也地理志曰澨水自劇東北至壽光入海泂其迤疑作  
逕趣即是水也

又東北入于海

巨洋水東北逕望海臺西東北流伏琛晏謨並以為  
平望亭在平壽縣故城西北八十里古縣又或言秦  
始皇升以望海因曰望海臺未詳也按史記漢武帝  
元朔元年封菑川懿王子劉賞為侯國按漢表劉賞  
封平望侯  
又東北注于海也

淄水出泰山萊蕪縣原山

明一統志萊蕪縣今屬泰安州原山在縣東五十里連淄

川縣界今名岳陽山淄水出其陰汶水出其陽

淄水出縣西南山下世謂之原泉地理志曰原山淄

水所出故經有原山之論矣

括地志曰淄州淄川縣東北七十里原山淄水

所出俗傳云禹治水功畢土石累數里之中波若漆故謂之淄水齊乘曰淄水出今益都縣岳陽山東麓地名泉河古萊蕪北岳陽即原山也淄多伏流上下有十八漏益都新志淄水源在泉河頭泉在縣西南一百三十里淮南子曰水出自飴山蓋山別名也東北流

逕萊蕪谷

谷在今益都縣西南元和志淄水西去益都縣五十五里

屈而西北流

逕其縣故城南

禹貢錐指曰元和志云萊蕪縣故城在今淄州東南六十里按故城明初

割屬益都今在其西南或仍謂在淄川縣界者誤也今萊蕪本漢羸縣唐省入博城後復以其地置萊蕪

縣在泰安州東一百二十里

從征記曰

錐指引此作述征記

城在萊蕪谷當

路岨絕兩山間道由南北門漢末有范史雲為萊蕪

令言萊蕪在齊非魯所得引舊說云齊靈公滅萊萊

民播流此谷邑落荒蕪禹貢所謂萊蕪也夾谷之會

齊侯使萊人以兵劫魯侯宣尼稱夷不亂華是也余

按太無萊柞並山名也郡縣取目焉漢高祖置左傳

曰與之無山

按左傳昭七年辭以無山與之萊祚乃有無之無非山名何邨氏忽改易傳文

曰與之無山及萊祚豈不謬誤之甚乎

何氏所考同

及萊祚是也應劭十三

州記曰太山萊蕪縣魯之萊祚邑淄水又西北轉逕

城西又東北流與一水合水出縣東南俗謂之家桑

谷水從

亦當作述

征記名曰聖水列仙傳曰鹿皮公者淄

川人也少為府小史才巧舉手成器岑山上有神象

人不能到小史白府君請木工斧三十人作祠屋留

止其傍其二間以自固食芝華飲神泉七十餘年淄

水未下當從朱本作來山下呼宗族得六十餘人命上山半水

出盡漂一郡沒者萬計小史辭遣宗室令下山著鹿

皮衣升閣而去後百餘年下賣藥齊市也其水西北

流注淄水淄水又北出山謂之萊蕪口東北流者

也齊東曰淄水自萊蕪谷又北逕長峪青州舊誌自臨淄西南至古萊蕪有長峪界兩山間踰二百里

中通淄河按長峪本名馬  
徑亦名奔中見春秋傳

又東北過臨淄縣東今臨淄縣乃漢營陵縣臨淄故城在青州府北五十里即所謂齊

也城

淄水自山東北流逕牛山西又東逕臨淄縣故城南  
東得天齊水口水出南郊山下謂之天齊淵五泉並  
出南北三百步廣十步山即牛山也左思齊都賦曰  
牛嶺鎮其南者也水在齊八祠中齊之為名起於此  
矣八祠事具史記封禪書地理風俗記曰齊所以為齊者即天  
齊淵名也其水北流注于淄水淄水又東逕四冢冢  
北水南山下有四冢方基員墳咸高七尺東西直列  
是田氏四王冢也淄水又東北逕陽陰里

項本作蕩陰里然下



有陽里則此亦當作陽里

西水東有家一基三墳東西八十步是

列士公孫接田開疆古冶子之墳也晏子惡其勇無

禮投桃以斃之死葬陽里即此也

晏子春秋曰晏子惡三人之無禮也

請公使人餽之二桃曰三子計功而食桃公孫接曰  
接一搏獮而再搏乳虎可以食桃矣田開疆曰吾伏  
兵而却三軍者再亦可以食桃矣古冶子曰吾嘗從  
君濟于河鼃啣左驂以入砥柱之流吾潛行逆流百  
步順行九里殺鼃而出可以食桃無與人同矣二子  
何不反桃抽劍而起二子皆挈領而死古冶子亦自  
挈領溜水又北逕其城東城臨溜水故曰臨溜王莽  
之齊陵縣也爾雅曰水出其前左為營丘武王以其

地封太公望賜之以四履都營丘為齊或以為都營  
陵史記周成王封師尚父于營丘東就國道宿行遲  
萊侯與之爭營丘逆旅之人曰吾聞時難得而易失  
客寢安殆非就封者也太公聞之夜衣而行至營丘  
陵亦丘也獻公自營丘徙臨淄余按營陵城南無水  
唯城北有一水世謂之白浪水西出丹山俗謂九山  
也東北流山疑衍爾雅出前左之文不得以為營丘  
或譌矣營丘者山名也詩所謂子之營兮遭我乎徂之間

兮作者多以丘陵號同又去萊差近咸言太公所封  
考之春秋經書諸侯城緣陵左傳曰遷杞也毛詩鄭  
注並無營字瓚以為非近之今臨淄城中有丘在小  
城內周迴三百步高九丈北降丈五淄水出其前故  
有營丘之名與爾雅相符城對天齊淵故城有齊城  
之稱是以晏子言始爽鳩氏居之逢伯陵居之太公  
居之又曰先君太公築營之丘季札觀風聞齊音曰  
泱泱乎大風也哉表東海者其太公乎田巴入齊過

淄自鏡

新序田巴臨淄水而觀形自知醜惡

郭景純言齊之營邱淄水

逕其南及東也非營陵明矣獻公之徙其猶晉氏深

翼居絳非謂自營陵而之也其外郭即獻公所徙臨

淄城也世謂之虜城言齊湣王伐燕燕王噲死虜其

民寶居因郭以名之

上下疑有譌錯朱云當作虜其民實居郭因以名之

秦始

皇三十四歲滅齊為郡治臨淄漢高帝六年封子肥

於齊為王國王莽更名濟南也戰國策曰田單為齊

相過淄水有老人涉淄而出不能行坐沙中單乃解

襄於斯水之上也

又東過利縣東

今博興縣東南有利縣故城

淄水自縣東北流逕東安平城北

禹貢錐指云應劭曰博昌縣西南三

十里有安平亭故縣也按淄水自利縣東又東北流不得過博昌之西南今臨淄縣東有安平故城若以為是則當先安平後利縣豈注文偶爾失次耶不然則道元誤引利縣東北當別有東安平城也

東逕巨淀

漢志齊郡鉅定即此

縣故城南

城在今樂安縣東北

征和四年

漢武帝幸東萊臨大海三月耕巨淀即此也縣東南

則巨淀

原本湖澱

湖蓋以水受名也淄水又東北逕廣饒

縣故城南

城亦在樂安縣東北漢廣饒巨淀二縣屬齊郡後漢省晉復置廣饒劉宋改曰千乘

歷代因之金改曰樂安元和志淄水南去千乘縣二十八里

漢武帝元鼎

按表是元狩

中封菑川靖王子劉國為侯國淄水又東北馬車瀆

水注之

在今樂安縣東北齊乘云今樂安高家港也縣志云在縣東五十里清水泊北

受巨

淀

受上疑有首字

淀即濁水所注也呂忱曰濁水一名溷水

出廣縣為山世謂之治嶺山東北流逕廣固城西城

在廣縣

今青州府治益都縣乃漢廣縣地

西北四里四周絕澗岨水

深隍晉永嘉中東萊人曹嶷所造也水側山際有五

龍口義熙五年劉武帝伐慕容超於廣固也以籍當

藉

焠難攻兵力勞弊河間人玄文說裕云昔趙攻曹

疑望氣者以為繩水

何氏云繩水之繩當從水

帶城非可攻拔若

塞五龍口城當必陷石虎從之疑請降降後五日大

雨雷電震開後慕容恪之攻拔龕

按十六國春秋秋當作段龕

十

旬不拔塞口而龕降後無幾又震開之舊基猶存宜

加修築裕塞之超及城內男女皆悉脚弱病者大半

超遂出奔為晉所擒也然城之所跨實憑地焠其不

可固城者在此濁水東北流逕堯山東從征記曰廣  
固城北三里有堯山祠堯因巡狩登此山後人遂以  
名山廟在山之左麓廟像東面華宇修整帝圖嚴飾  
軒冕之容穆然山之上頂舊有上疑衍祠今也毀廢

無復遺式盤石上尚有人馬之跡徒黃石而已唯刀

劍之蹤逼真矣至於燕鋒岱鏑魏缺齊鉞與今劍莫

殊以蜜模寫知人功所制矣

朱謀埠曰莊子云天子之劍以燕谿石城為鋒

齊岱為鏑晉魏為脊周宋為鐔韓魏為夾以蜜模寫疑當作蜜謂以蠟模搨其迹也晉書山濤傳有蜜章



亦謂以蠟封奏章也

西望胡公陵孫暢之所云青州刺史傳弘

仁言得銅棺隸書處濁水又東北流逕東陽城北

在青

州府城宋武代燕廢廣固築此

東北流逕廣縣故城西舊有州刺史

治亦曰青州城陽水又東北流石井水注之水出南

山頂洞開望若門焉俗謂是山為劈頭山其水北流

注井井際廣城東側三百積石高深一匹有餘長津

激浪瀑布而下彭蠡之音驚川聒谷崩奔之勢狀同

洪井北流入陽水余生長東齊極遊其下於中闊絕

乃積綿載後因王事復出海岱郭金紫惠同石井賦  
詩言意爾日嬉娛九慰羈心但恨此水時有通塞耳

陽水東逕故七級寺禪房南水北則長廡徧駕迴閣

承阿

上下有脫文

林之際則繩坐䟽班錫鉢閒設所謂修

修釋子眇眇禪棲者也陽水又東東逕

疑作逕東

陽城東

南義熙中晉青州刺史羊穆之築此以在陽水之東

即謂城

疑衍

之東陽城世以濁水為西陽水故也水

流亦有時窮通信為靈矣昔在宋世是水絕而復流

劉冕賦通津焉魏太和中此水復竭輟流積年先公

滁疑作除

州即任未暮

北史酈範字世則范陽涿鹿人太武時給事東宮太武踐祚追

錄先朝舊勳賜爵永寧男後為青州刺史進爵為侯

是水復通澄映盈川所謂

幽谷枯而更溢窮泉輟而復流矣海岱之士又頌通

津焉平昌耆民孫道相頌曰唯彼繩泉竭踰三齡祈

盡珪璧謁窮斯牲道從隆替降由聖明耆民河間趙

嶷頌云敷化未暮玄澤潛施枯源揚瀾涸川滌陂北

海郭欽曰先政輟津我后通洋但頌廣文煩難以具

載陽水又北屈逕漢城陽景王劉章廟東東注于巨  
洋後人竭斷令北注濁水時人通謂濁水為陽水故  
有南陽北陽水之論二水渾流世謂之為長沙水也  
亦或通名之為澗水故晏謨伏琛為齊記並云東陽  
城既在澗水之陽宜為繩陽城非也世又謂陽水為  
洋水余按羣書盛言洋水出臨朐縣而陽水道源廣  
縣兩縣雖隣川土不同於事疑焉濁水又北逕臧氏  
臺西又北逕益城西又北流注巨淀地理志曰廣縣

為山濁水所出東北至廣饒入巨淀巨淀之右又有  
女水注之水出東安平縣之蛇頭山從征記曰水西  
有桓公冢甚高大墓方七十餘丈高四丈員墳圍二  
十餘丈高七丈餘一墓方七丈二墳晏謨曰依陵記  
非葬禮上下疑如承世故與其母同墓而異墳伏琛  
所不詳也冢東山下女水原有桓公祠侍其衡侍其  
酈食其奏魏武王所立曰近日路次齊郊瞻望桓公  
之後墳壟在南山之阿請為立祀為塊然之主郭緣生述

征記曰齊桓公冢在齊城南二十里因山為墳冢東有女水或云齊桓公女冢在其上故以名水也女水導川東北流甚有神焉化隆則水生政薄則津竭燕建平六年水忽暴竭玄明惡之寢病而亡燕太上四年女水又竭慕容超惡之燕祚遂淪女水東北流逕東平安當作平安縣故城南續述征記曰女水至安平城南在今臨淄縣東一十里伏流一十五里然後更流注北陽水城故鄒亭也春秋魯莊公三年紀季以鄒入齊公

羊傳曰季者何紀侯弟也賢其伏罪請鄆以奉五祀

公羊傳曰紀季者何紀侯之弟也何以不名賢乎紀季服罪也其服罪奈何魯子曰請後五廟以存姑姊

妹

田成子單之故邑也

史記齊襄王入臨淄封田單為安平君集解云安平城在

青州臨淄縣東十九里古紀之鄆邑也

後以為縣博陵有

疑漏安字

平故此

加東也世祖建武七年封菑川王子劉茂為侯國

按後

漢書宗室五王傳泗水王歙光武族父也歙子終與光武少相親愛建武二年立歙為泗水王終為淄川

王終長子柱封即侯少子鳳封曲陽侯歙從父弟茂漢兵起亦聚眾京密間後率眾降封為中山王十三

年宗室為王皆降為侯更侯茂為穰侯傳所載甚明淄川王子無名茂亦無封安平侯者至于茂于淄川

王為從父叔亦不封安平侯不知此注何所本也

又逕安平城東東北逕龍邱

東東北入淀地理志曰菟頭山

按漢志作菟頭山

女水所出東

北至臨淄入巨淀又北為馬車瀆北合淄水又北時繩

之水注之時水出齊城西南

通鑑注作西北二十五里

二十五里平

地出泉即如水也

朱本云當作而水愚謂當作形水

亦謂之源水因水

色黑俗又目之為黑水

明一統志時水在臨淄縣西南二十五里一名形左傳齊晉盟

于形是也其源淺旱則涸故又名乾時左傳公與齊侯戰于乾時是也其色黑故俗名烏河

西北

逕黃山東又北歷愚山山東有愚公冢時水又屈而



逕杜山北有愚公谷齊桓公時公隱於溪隣有認其

駒者公以與之山即杜山之通阜以其人狀愚故謂

之愚公衍山

韓非子曰齊桓公入山問父老此名何谷答曰臣舊畜牛生犢以子買駒少年

謂牛不生駒遂持而去人謂臣愚遂名為愚公谷今愚公山在臨淄縣西二十里東有愚公冢北有愚公

谷

水有石梁亦謂為石梁水又有澧一作澧水注之

水出時水東去臨淄城十八里所謂澧中也俗以澧

水為宿留水西北入于時水孟子去齊三宿而後出

澧故世以此而變水名也水南山西有王歆墓昔樂

毅伐齊賢而封之歟不受自縊而死水側有田引水

溉跡尚存時水又西北逕西安縣故城南

故城在今臨淄縣西

三十里本渠也齊大夫雖稟之邑矣王莽更之曰東寧

時水又西至石洋堰分為二水謂之石洋口枝津西北至梁鄒入泲時水又北逕西安城西又北京水系水注之水出齊城西南世謂寒泉也東北流直申門西京相璠杜預並言申門即齊城南面西第一門矣為申池昔齊懿公遊申池邴戎庸職二人害公於竹

中左傳作邴歇闕職二人今池無復鬚鬣然水側尚

有小小竹木以時遺生也左思齊都賦注申池在海

濱齊數也余按春秋襄公十八年晉伐齊戊戌伐雖

門之荻已亥焚雍門壬寅焚東北二郭甲辰東侵及

沂而不言北掠于海且晉獻子尚不辭死以逞志何

容封仇敵而不徵暴草木于海隅乎又炎夏火流非

遠遊之辰懿公見弑蓋是白龍魚遁見困近郊矣說苑

伍子胥曰昔白龍下清冷之淵化為魚豫且射中其目此蓋用其事也左氏捨近遺遠

考古非議

何氏云疑有脫文

杜預泛言有推據耳系水傍城

北流逕陽門西水次有故封處所謂齊之稷下也當

戰國之時以齊宣王喜文學遊說之士鄒衍淳于髡

田駢接于慎到之徒七十六人皆賜列第為上大夫

不治而論議是以齊稷下學士復盛且數百十人劉

向別錄以稷為齊城門名也談說之士期會於稷門

下故曰稷下也鄭志曰張逸問贊云

何氏云贊上當有書字

我

先師棘下生何時人鄭玄答云齊田氏時善學者所

會處也齊人號之棘下生無常人也余按左傳昭公

二十二年莒子如齊盟于稷門之外漢以叔孫通為

博士號稷嗣君史記音義曰欲以繼蹤齊稷下之風

矣然棘下又是齊

何氏校  
改魯

城內地名左傳定公八年

陽虎劫公伐孟氏入自上東門戰于南門之內又戰

于棘下者也蓋亦儒者之所萃焉故張逸疑而發問

鄭玄釋而辯之雖異名于見大歸一也城內有故臺

有營邱有故景王祠即朱虛侯章廟矣晉起居注云

齊有大蛇長三百步負小蛇長百餘步逕於市中市人悉觀自北門所入處也北門外東北二百步有齊相晏嬰冢宅左傳晏子之宅近市景公欲易之而嬰弗更為誡曰吾生則近市死豈易志乃葬故宅後人名之曰清節里系水又北逕臨淄城西門北而西流逕梧宮南昔楚使聘齊齊王饗之梧宮即是宮矣其地猶漏名梧臺里臺甚層秀東西一百餘步南北加減字即古梧宮之臺臺即關子所謂宋愚人得燕石處

闕子曰宋之愚人得燕石于梧臺之東歸而藏之以為寶周客聞而求觀主人齋戒七日端冕以發革櫃十重緹巾十襲客見之掩口笑曰此特燕石耳與瓦甕不殊

臺西有石杜碑碑猶

存漢靈帝熹平五年立其題云梧臺里系水又西逕

葵丘北春秋莊公八年襄公使連稱管至父戍葵丘

京相璠曰齊西五十里有葵丘地若是無戍之此句疑有

脫僖公九年齊桓會諸侯于葵丘宰孔曰齊侯不務

修德而勤遠畧葵丘不在齊也引胡廣汾陰葵丘山

陽西戎葵城宜在此非也余原左傳連稱管至父之

戊葵丘以瓜時而往還之期請代弗許將為齊亂故  
令無寵之妹候公於宮因無知之出遂害襄公若出  
遠無代寧得謀及婦人而為公室之亂乎是以杜預  
稽春秋之旨即傳安之注于臨淄西不得捨近託遠

苟成已異於異可殊即義為負然則葵丘之戊即此

地也

未曰埗按左傳齊桓公葵丘之會宰孔曰齊侯不務修德而勤遠畧故北伐山戎南伐楚西為

此會也且天子使賜桓公于文武之胙知與王都近矣故胡廣有山陽西北葵城之說而杜預說連稱管至父葵丘之戊云在臨淄西有地時水西左迤為潭

名葵丘灑疑胡廣傳會故發此論

時水西左迤為潭



又西逕高陽僑郡南魏所立也又西北流注于時時  
水又東北流澠水注之水出營城東世謂之漢漆水  
也西北流逕營城北漢景帝四年封齊悼惠王子劉  
信都為侯國澠水又西逕樂安南

疑作國

博昌縣故城

南

故城在今博興縣東二十五里

應劭曰昌水出東萊昌陽縣

今為登州

府萊陽縣道遠不至取其嘉名闕駟曰縣處勢平故曰博

昌澠水西歷貝丘京相璠曰博昌縣南近澠水有地名貝丘在齊西北四十里春秋莊公八年齊侯田于

貝丘見公子彭生豕立而泣齊侯墜車傷足於是處也澠水又西北入時水從征記又曰水出臨淄縣北逕樂安博昌南界西入時水者也自下通謂之為澠也昔晉侯與齊侯宴齊侯曰有酒如澠指喻此水也時水又屈而東北逕博昌城北時水又東北逕齊郡利縣故城北又東北逕巨淀縣故城北又東北逕廣饒縣故城北東北入淄水

齊乘曰時水之源南近淄水詳其地形蓋代淄所發

土人名曰烏河一名耐水亦名如水澠水北流勢極屈曲俗稱九里十八灣

地理風俗志

曰淄入濡淮南子曰白公問微言曰若以水投水如

何孔子曰淄澠之水合易牙嘗而知之謂斯水矣淮南

所引孔子白公語出列子說符篇及呂氏春秋審應覽俱作淄澠音緇乘列子曰口將爽者先辨淄澠張

湛注云淄水出齊郡萊蕪縣澠水出北海郡千乘縣界流至壽光縣二水相合

又東北入于海

淄水入馬車瀆東北逕琅槐故城南

應劭曰博昌北八十里有琅槐

鄉故縣也今樂安縣東北一百十里琅槐故城是

又東北逕馬井城北與時

繩之水互受通稱故邑流其號又東北至皮丘沈入

于海

字典云齊人謂湖曰沈郭緣生述征記有鳥

故

晏謨伏琛並言淄繩之水合於皮丘沈西

元和志壽光縣淄繩

二水西自千乘縣界流入去縣四十里

地理志曰馬車瀆至琅槐入于

海也蓋舉縣言也

謂言琅槐而不言皮丘坳也

禹貢錐指云以今輿地言之淄水出益都縣東南

岳陽山厯臨淄博興樂安至壽光縣北由清水泊

入海

並屬青州府元和志渤海在壽光縣東北一百十里

據琅槐故城在今

樂安縣界則淄水入海不當在壽光然清水泊跨

二縣之境必皆漢琅槐地馬車瀆近海處豈即古

之皮丘坑與

元和志十乘縣北青丘齊景公田于青即此齊乘云清水泊是也

朱

長孺曰淄水地志云入濟水經云入海者馬車瀆

以下乃濟水入海處淄水入海之道與濟水正同

非經志互有齟齬也渭按濟由馬車瀆入海自金

皇統中始前此不爾也河渠書云于齊通淄濟之

間故淄得由博昌入濟水地志謂淄入濟水經謂

淄入海杜預謂淄入汶鄭樵以入汶為是今按左

傳昭二十六年成人伐齊師之飲馬于淄者注云

淄水出泰山梁父縣西北入汶此淄即柴汶也杜

注左傳不悞鄭據以為禹貢之淄則悞耳

汶水出朱虛縣泰山

漢志琅邪郡朱虛縣東泰山汶水所出東至安邱入濰師古曰前言

汶水出萊蕪入濟今此又言出朱虛入濰將桑欽所說有異或者有二汶水乎 曾彥曰汶水有二出蕪原

山入濟者徐州之汶也出朱虛泰山入濰者青州之汶也胡渭曰原山北接淄州延袤跨青徐之境汶雖徐水其源源處猶為青域故禹貢青之貢道猶書浮于汶云朱虛城在今臨朐縣界漢縣屬琅琊郡東海屬北海

國隋省入部城今為安邱縣地

山上有長城西接岱山東連琅耶巨海千有餘里蓋

田氏之所造也竹書紀年梁惠成王二十年齊築防

以為長城竹書又云晉列公十二年王命韓景子趙

列侯翟員伐齊入長城

按竹書紀年晉烈公十二年王命韓景子趙烈侯及我師

伐齊入長城此引頗悞

史記所謂齊威王越趙侵伐我長城者

也伏琛晏謨並言水出縣東南崕山山在小泰山東

者也

北過其縣東

汶水自縣東北逕岵城北地理風俗記曰朱虛縣東

四十里有岵城亭故縣也

岵當作郚按春秋莊公元年齊遷紀郚杜預曰郚在

朱虛縣東南今安邱西南六十里有郚城

又東北逕管寧塚東故晏謨言

柴阜西南有魏獨行君子管寧墓墓前有碑又東北

逕柴阜山北山之東有徵士郚原冢碑誌存焉汶水

又東北逕漢青州刺史孫嵩墓西有碑碣汶水又東

逕安丘縣故城北漢高帝八年封將軍張說為侯國

地理志曰王莽之誅郚也孟康曰今渠丘亭莒渠丘



城是也伏琛晏謨齊記並言亭在丘城東北十里非  
城也城對牟山山之西南有孫賓碩兄弟墓碑志並  
在也

又北過淳于縣西又東北入于縣

故夏候氏之斟灌國也周武王以封淳于公號曰淳

于國春秋桓公六年冬周公如曹

按春秋當作州公如曹杜預曰州國

名淳于州國所都城陽淳于縣也

傳曰淳于公如曹度其國危遂不

復也其城東北則兩川交會也

淮水出琅邪箕縣

日知錄曰淮水出琅邪郡箕屋山書禹貢淮溜其道左傳襄公十八年晉

師東侵及淮是也其字或省水作維或省糸作淮又或從心作惟總是一字漢書地理志琅瑯郡朱虛下箕下作維靈門下橫下折泉下作淮上文引禹貢惟留其道又作惟一卷之中異文三見通鑑梁武帝紀魏李叔仁擊邢杲于惟水古人之文或省或借其旁並從鳥佳之佳則一爾後人誤讀淮沂其又之淮而呼此水為槐河矣

琅邪山名也越王勾踐之故國也勾踐并吳欲霸中國徙都琅邪秦始皇二十六年滅齊以為郡城即秦王之所築也遂登琅邪大樂之山作層臺於其上謂

琅邪臺

琅邪臺在諸城縣琅邪山

臺在城東南十里孤立特顯出

于眾山上下周二十里餘傍濱巨海秦王樂之因留

三月乃徙黔首二萬戶於琅邪山下復十二年所作

臺基三層層高三丈上級平敞方二百餘步高五里

刊石立碑紀秦功德臺上有神淵淵主靈焉人汙之

則竭齋潔則通神廟在齊八祠中漢武帝亦嘗登之

漢高帝呂后

帝后並舉疑有誤

七年以為王國文帝三年更

名為郡王莽改曰填夷矣濰水導源濰山

元和志濰山在密州

莒縣東北八十  
三里濰水所出

許慎吕忱云濰水出箕屋山  
胡氏曰說文濰

水出琅邪箕屋謂琅邪郡箕  
縣之屋山非山名箕屋也

淮南子曰濰水出覆舟

山蓋廣異名也東北逕箕縣故城西又西析泉水注

之水出析泉縣北

按漢志琅邪郡有析泉縣此云析悞下同

松山東南流

析泉縣東又東南逕仲固山東北流入于濰地理志

曰至箕縣北入濰者也濰水又東北逕諸縣故城西

城在今諸城縣西南

春秋文公十二年季孫行父城諸及鄆傳

曰城其下邑也王莽更名諸并矣濰水又東北涓水

注之出馬耳山

在諸城縣西南六十里

山高百丈上有二石並

舉望齊馬耳故世取名焉東去常山三十里涓水發于其陰北逕婁鄉城東春秋昭公五年經書夏莒牟夷以牟婁防茲來奔者也又分諸縣之東為海曲縣故俗人謂此城為東諸城涓水又北注于濰水

東北過東武城縣西

當作東武縣雖指引此亦作東北逕東武縣故城西

縣因岡為城城周三十里漢高帝六年封郭嘉

按史表當

作郭蒙

為侯國王莽更名之曰祥善矣又北左合扶淇

之水水出西南常山東北流注濰晏謨並以濰水為  
扶淇之水以扶淇之水為濰水非也按經脉誌濰自  
箕縣北逕東武縣西北流合扶淇之水晏謨伏琛云  
東武城西北二里濰水者即扶淇之水也濰水又北  
右合盧水即久台水也地理志曰水出琅邪橫縣故

山

按漢志琅邪郡橫縣下云故山名台水所出此云  
久台水似誤按故山名者即指橫而言非橫縣有

故山也今云水出橫縣故山則似竟有其山矣總因  
以名字譌作久字遂以故山為句而譌作久台水也

王莽之合邱也

按志莽曰令邱今云合譌

山在東武縣故城東南

東武漢琅邪郡治也今為諸城縣治

世謂之廬山也西北流逕

疑漏平字

昌

縣故城西

平昌故城在今安丘縣西南六十里

東北流齊地記曰東武

城東南有廬水水側有勝火木方俗音曰檉子其木

經野火燒死炭不滅故東方朔

朔下疑有脫文

不灰之木者

也其水又東北流逕東武縣故城東而西北入濰地

理志曰久疑

疑

台水出東南逕東武入濰者也尚書所

謂濰淄其道矣

又北過平昌縣東

澠水又北逕石泉縣故城西王莽之養信也地理風俗記曰平昌縣東南四十里有石泉亭故縣也澠水

又北逕平昌縣故城東

在今安邱縣西南六十里

荆水注之水出

縣南荆山阜東北流逕平昌縣故城東漢文帝封齊

悼惠王肥子永為侯國

按史漢表齊悼惠王子印封平昌侯今云永誤

城之

東南角有臺臺下有井與荆水通物墜於井則取之

荆水昔常有龍出入于其中故世亦謂之龍臺城也

荆水又東北流注于澠水又北浯水注之水出浯山



世謂之巨平山也地理志曰靈門縣有高原山與浯

一山

按漢志靈門縣有高原山壺山浯水所出師古曰原即柘字也今云原謠浯一山亦當作壺山

浯水所出東北入澨今是山西接浯山許慎說文言

水出靈門山世謂之浯汶矣其水東北逕姑幕縣故

城東

薄姑城在今博興縣東一十五里又有姑幕城在莒州境內漢縣北齊省入東莞縣有

五色土王者封建諸侯隨方受之故薄姑氏之國也

關駟曰周成王時薄姑與四國作亂周公滅之以封

太公是以地理志曰或言薄姑也王莽曰季睦矣應

劬曰左傳曰薄姑氏國太公封焉薛瓚漢書注云博  
昌有薄姑城未知孰是浯水又東北逕平昌縣故城  
北古竭以溢溉田南注荆水浯水又東北流而注于  
澠水也

又北過高密縣西

今屬萊州府

應劭曰縣有密水故有高密之名也然今世所謂百  
尺水者蓋密水也水有二源西源出奕山亦曰鄆日  
山晏謨曰山狀鄆日是有此名伏琛曰山上鄆日故

名鄣日山也其水東北流東源出五弩山西北流同  
瀉一壑俗謂之百尺水古人竭以溉田數十頃北流  
逕高密縣西下注濰水自下亦兼通稱焉亂流歷縣  
西碑產山西又東北水有故堰舊鑿石豎柱斷濰水  
廣六十許步掘東岸激通長渠東北逕高密故城南

明帝中元

明帝無中元  
之號誤見下

中封鄧震為侯國

後漢書鄧  
禹封高密

侯禹卒長  
子震嗣

縣南十里蓄以為塘方二十餘里古所謂

高密之南都也溉田一頃許陂水散流下注矣

疑謠  
當作

夷  
安澤澨水自堰北逕高密縣故城西

城在今縣西南元和志澨

水在高密縣西南去縣四十里

漢文帝十六年別為膠西國宣帝本

始元年更為高密國王莽之章牟也澨水又北昔韓

信與楚將龍且夾澨水而陣於此信夜令為萬餘囊

盛沙以遏澨水引軍擊且偽退且追北信決水水大

至且軍半不得渡遂斬龍且於是水水西有鴈阜阜

上有漢司農卿鄭康成冢

在今高密縣西北五十里

石碑猶存又

北逕昌安縣故城東

在今安丘縣西南十里

漢明帝中元

明帝止承

平一號無所謂中元者鄧禹傳襲于永平元年封

中封鄧襲為侯國也郡國

志曰漢安帝延光元年復也

又北過淳于縣東

今安丘縣東北有淳于故城濰水在縣東五十里

濰水又北左會汶水

胡云此東汶也出朱虛縣小泰山

北逕平城亭

西又東北逕密鄉亭西郡國志淳于縣有密鄉地理

志皆北海之屬縣也應劭曰淳于縣東北六十里有

平城亭又四十里有密鄉亭故縣也

今昌邑縣南有平城故城東南

有密鄉故城

濰水又東北逕下密縣故城西

城在昌邑縣東南與濰縣

接界濰縣本唐北海縣元和志海在北海縣東北一百二十里濰水南去縣五十五里城東有

密阜地理志曰有三戶山祠余按應劭密者水名是有下密之稱俗以之名阜非也

又東北逕都昌縣東

今為萊州府昌邑縣晉省都昌入掖縣宋建隆三年始以其地改置

昌邑縣

濰水東北逕蓬萌墓萌縣人也少有大節恥給事縣

亭遂浮海至遼東復還在不其山隱學

不其山在即墨縣東南四

十里明帝安車徵萌以佯狂免又北逕都昌縣故城東

漢高祖六年封朱軫為侯國北海相孔融為黃巾賊

管亥所圍於都昌也太史慈為融求救劉備持的突

圍其處也

吳志北海相孔融數遣人訊問太史慈之  
母并致餉遺後融出屯都昌為黃巾賊管

亥所圍慈自遼東還家母令慈往赴其難時賊圍甚  
密慈請于融帶鞬攝乃上馬將兩騎自隨各作一的  
持之開門直出外圍下馬植的射之徑入閉門明日  
復如此射的賊或起或卧又明晨出射無復起者慈  
乃鞭馬直突圍馳詣劉備于  
平原得救兵來賊遂解去

又東北入于海

元和志萊州掖縣海  
在縣北五十二里

禹貢錐指云以今輿地言之濰水出莒州東北濰

山歷諸城

屬青州府

高密

萊州府

安邱

青州府

濰縣

至昌邑

東北五十里入海也

並萊州府

膠水出黔陬縣

今為萊州府膠州

膠山北過其縣西

膠水源發膠州鐵嶽

山北過密州五弩山鹵水入焉又北過高密縣注瀦澤與張奴水合自澤北入新河經平度州昌邑縣界入海

齊記曰膠水出五弩山蓋膠山之殊名也北逕祝茲

縣故城東漢武帝元鼎中封膠東康王子延為侯國

按漢表膠東康王子延年封祝茲侯此漏年字

又逕扶

何氏校漢志作却

縣故城西

地理志琅邪之屬縣也漢文帝元年封呂平為侯國



按漢志琅邪郡却縣膠水所出師古曰音扶縣名本  
不作扶又按史漢表呂平封扶柳侯索隱曰縣名屬  
信都國與此之却縣無涉不知酈注何據耶 膠水又北逕黔陬陬下當有縣字故

城西袁崧郡國志曰縣有介亭地理志曰故介國也

春秋僖公九年

按左傳是僖公二十九年今云九年誤

介葛盧來朝聞

牛鳴曰是生三犧皆用之問之果然晏謨伏琛並云

縣有東西二城相去四十里有膠水非也斯乃拒艾

水也水出縣西南拒艾山即齊記所謂黔艾山也東

北流逕拒縣故城西王莽之秩國也

按漢志琅邪郡有拒縣如淳曰

音巨不作拒又云根艾水東入海亦不作拒艾水莽曰被同亦不曰袂國此注所引皆誤世謂之

王城又謂是水為洋洋水矣又東北逕晏伏所謂黔  
陬城西四十里有膠水者也又東入海地理志曰琅

邪有拒縣拒艾水出焉東入海即斯水也今膠水北

逕晏伏所謂西黔陬城東高密郡側有黔陬縣地理

志曰膠水出知縣當作知縣王莽更之純德矣疑即是縣

所未詳

又北過夷安縣東

縣王莽更名之曰原亭也應劭曰故萊夷

按漢志漏維字

邑

也太史公曰晏平仲萊之夷維之人也漢明帝中元

誤見前

中封鄧珍為侯國西去濰水四十里膠水又北


逕膠陽東晏伏並謂之東亭自亭結路南通夷安地理風俗記曰淳于縣東南五十里有膠陽亭故縣也又東北逕左會一水世謂之張奴水水發夷安縣東南阜下西北流歷膠陽縣注于膠水之左東北為澤水渚百許里謂之夷安潭潭之澤周四十里亦濰水

枝津之所注也膠水又東北逕下密縣故城東又東北逕膠東縣故城西漢高帝元年別為國景帝封子寄為王國王莽更之郁秩按漢志作秩也今長廣郡治伏琛晏謨言膠水東北迴達于膠東城北百里流注于海

又北過當利縣西北入于海

縣故王莽更之東萊亭也又北逕平度縣漢武帝元朔二年封菑川懿王子劉行為侯國王莽更名之曰

利盧也縣有土山膠水北厯土山注于海海南土山  
以北悉鹽坑相承修煑不輟北眺巨海杳冥無極天  
際兩分白黑方別所謂之溟海者也故地理志曰膠  
水北至平度入海者也



水經注集釋訂訛卷二十六